

Numbers Au Mutulua

Pariverena

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biaḡa sorodia. Wei bukana nanare Mai Israel ai mae au mutulua madeḡa 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

6

Aaron natunatuna maiteni ai Viaiaina

²² BADA Moses i riwei i pa, ²³ “Aaron ma natunatuna ma riwei da wenanare mai Israel ina viaiaini ina pa,

²⁴ ‘BADA ina viaiainimi
ma ina gagaloemi.

²⁵ BADA ivina ina ai awarimi
ma ina paina-kauemi.

²⁶ BADA ana nuaiaina ina mae-tavirei awarimi
ma nuauba ina veremi.’

²⁷ Ma nanarena, maranai Aaron ma natunatuna Tau wavauei mai Israel e viviaiaiini, ma Tau ana viaiaiini.”

13

Taurauivu Canaan i tuvirevirei

¹ BADA Moses i riwei i pa, ² “Mai Israel ai dam 12 au orai rewapana tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei.”

³ Ma BADA i ririweia nanare Moses i kauai. Mai Israel ai dam 12 babadai i paritawanei. Tau ai ḡaravu au mutulua Paran i voterei da i nae au Canaan.

¹⁷ Maranai Moses ravai i paritawanei da dobuna ita ivui ma i riwei i pa, “Au Negev ona virautua da dobu vio-laolana ona naeni da au navanava ġelauna. ¹⁸ Dobu ona tuvirevirei, ma ana patara ona inanai menanare, rava ai maġa ma ai rewapana bo ai ġokokokara? ¹⁹ Doa mau-maurana bo eġa? Ai melaġai ona tuvirevirei, garigarina bo e mamae lota? ²⁰ Doa maumaurana bo eġa? Ai e gogogo bo eġa? Ma ona kauana-guratei da ai anoi ġelau i ona purai da ona neiai.”

²¹ Anina ma tau i dobuna i naeni, au mutulua Zin* i vikarei ma dobuna i naeni da au ġia dewadewana au Rehob, wei lamna Lebo Hamath au ġereġerena.

Taurauivu i nememei

²⁵ Au pom 40 taurauivu dobu i tuvirevirei ma i nememei, ²⁶⁻²⁷ I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataiei. Ma i parivere i pa, “U paritawanelai da dobuna a ivui, marina grape ana ġou marana ma a inanai da ani ipi gabuna aiaina ma doa maumaurana, ma aina anoi ġelau i a neiai da ona inanai. ²⁸ Wate kampa rava ġaiġaiawai e mamae, ma ai melagai i rata kau ma i gari-kwaviviroi da eġa ġavia ina rui. Ma kampa mai Anak a inanai. ²⁹ Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae.”

³⁰ Ma Caleb, rava i riwei da i ġenuana ma i riwa i pa, “Tana nae dobuna ravai tana virubai ma dobuna tana vaia!”

* ^{13:21}: Wei lamna dobu ġaeġaena Negev au paratana i vikarei da i nae da ola Hermon au ġereġerena ma Hamath melagaina.

³¹ Wate taurauivu maiteni i gēgāe i pa, “Egā! Ravai i virewapana kaua ega me tauta. Ega tana viḡaviei.” ³² Ma nanare tau i nai dobuna ana apoapoe riwana i vibabara i mai Israel awari i pa, “Nai ega ani ipi doana aiaina ma rava manamanai ma gāiḡaiawai kampa e mamae. ³³ Ma kampa rava gāiḡaiawai Mai Nephili[†] a inanai (Mai Anak noinoi) tauai a inana-meleiai lamna me kapau ma nanare tau i au matai lamna tauai me kapau.”

14

Mai Israel Moses ma Aaron i viḡaviei

¹ Ma nai waguvaraina rava anata-pui i tou mara. ² Tau i anata-pui Moses ma Aaron i viḡaviei i pa, “Airake au Egypt ata iraḡe ota! Bo weka au mutulua. ³ Aiwai aubaina BADA e nainaieta wei au dobuna da ravai sodei ina viraḡenita ma awawata ma natunatuta ina pani-naiei. I ai kaua da tata wanaviraita au Egypt.” ⁴ Ma tau i babani vivira i pa, “Bada tana vinei da ina naiana-meleta au Egypt.”

⁵ Anina ma Moses ma Aaron i mae-gāira da naoi au doa Israel patarana au matai. ⁶ Nun natuna Joshua ma Jephune natuna Caleb ruaḡai, tau i maiteni dobu i tuvirevirei, ai gara i sikai, ⁷ ma mai Israel anata-pui i riwei, “Dobuna anata-punana a naeni ma a tuvirevirei ma dobu maumaurana. ⁸ Mepa da BADA nuanuana ina ai awarita ma ina ruieta dobuna maumaurana awarina, weka sia ma lam ega anibaiana. ⁹ Wate BADA ega ona viḡaviei. Ma ravai dobuna e maemaeni ega ona rovoei, tana viaḡaḡana-opunei. Tau i ai agu ega. Tauta BADA maiteni ta mamae! Ravai ega ona rovoei!”

[†] 13:33: Mai Nephili ega tata aramana-kauei, wate tau i rava gogogobui. Gen 6:4 e ririweta da tau i meiei i nei.

¹⁰ Mai Israel Caleb ma Joshua ġaimei ita viragēni wate BADA ana borumana i eġa numagara au tepana.

God Moses i riwei da ita wanavirai ma ana rava ita taravaina-naiei au mutulua da etanai e nenaē au Boga lebalebarina ita naeni.

God i riwa da rava ina kovoġi

²⁶ BADA Moses ma Aaron i riwei, ²⁷ “Wei ravai apoapoe ai beura awariu a nonora, iauei! Mai Israel ai pariviravira awariu a nonori.” ²⁸ Wenanare ma paribelei, “BADA i riwa, “Tau wavauei a ririwa da aiwai o vivibaġei, nanare ana kauei.” ²⁹ Taumi au mutulua tupuami urabovai ina nae. O pari-virevireu aubaina taumi ami madeġa 20 ma e ġeġae ona iraġe. ³⁰ A parivainuaġami da wei au dobuna ota mae wate eġa aiai tagogi wei au dobuna ina rui anina Jephune natuna Caleb ma Nun natuna Joshua.

³¹ Ma o ririwa da natunatumi ina vaia ai panipani, wate tau kampa ana ruiei da dobuna o gedugeduaieia ina maeni. ³² Wate taumi patarami tupuami au mutulua ina bova-nae. ³³ ✧Eġa ota vipatutu ma lamna aubaina natunatumi ina vinuapoapoe au mutulua ma ina kovoġi da ina viġamoġamo-nae da madeġa 40 ina kwa nai maranaina taumi kimta magurimi ona iraġe-pai. ³⁴ Aupom 40 dobuna o tuvirevirei lamna aubaina ana kovoġimi da madeġa 40, au pom tagogi maiana madeġa tagogi. Ami ġo’apoapoei aubai au kovoġa malana ona vaia. ³⁵ TAU BADA, A riwa! Tau wei ana kauei taumi ġo’apoapoe ravami anapumi awarimi. Ami rava maiteni o vitagogiemi ma o viġavieu. Taumi anapumi au mutulua ona kwa, taumi weka ona iraġe.

✧ 14:33: Act 7:36

20

Miriam i 'raḡe

¹ Nawaravi au vouna mai Israel anatapui au mutulua Zin i ḡeta ma au Kadesh i rauḡaravu. Weka Miriam i 'raḡe da i doboi.

Mai Israel Moses maiteni i viparipariniḡai

² ✧ Kampa Waira eḡa ma lamna aubaina tau i vitagogiei ma Moses ma Aaron ai ḡavia i vomairi, ³ ma Moses maiteni i viparipariniḡai i pa, “Rorova varevareiai maiteni ata iraḡe tagogi BADA au matana!” ⁴ Aiwai aubaina BADA ana rava u neiai au mutulua ana ḡamoḡamoi da ina iraḡe ⁵ Aiwai aubaina Egyptei u tere-opunelai ma u neiai wei dobuna apoapoena awarina? Weka eḡa ani ipi doana aiaina da witi da damala aina bo grape warami bo *Pomegranates* aina ina gogo, ma eḡa waira aniuma!

⁶ Moses ma Aaron, patara i voterei ma i nae BADA ana numagara au metaetana ma i mae-peu au doa ma i raudune. Ma BADA ana borumana i eḡa. ⁷ Ma BADA Moses i riwei, ⁸ “Am jiḡona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai ḡamoḡamo maiteni. ⁹ Anina ma Moses jiḡona BADA au naona i vaia, i ririwei nanare.”

Moses kira i ravi

¹⁰ Ma Moses ma Aaron dam Israel i vitagogiei kira au naona ma Moses i riwa, “Ora potapotami! Ona genuana! Tauai waira kira au orana ana tere-opuniaia aubaimi!”

¹¹ Ma Moses ana jigona i voepai ma kira i ravi mara ruaḡa. Ma waira ḡaeḡaena i ruba-opu da rava ma ḡamoḡamo i uma.

¹² Anina ma BADA, Moses ma Aaron i riwei, “Taumi eġa ota vitumaġana-kaueu da Tau vivivireu ami dam Israel au matai, ma lamna aubaina taumi eġa wei ravai ona ruiei dobuna a vereveremiana awarina.”

Aaron i 'raġe

²³ Au ola Hor, Edom ana au parata, kampa BADA Moses ma Aaron i riwei, ²⁴ “Taumi riwau o rauaġaiġaiei au Meribah ma lamna aubaina, dobu mai Israel a verevereia, Aaron kampa eġa ina rui. Tauna noinoina ina votaġoi. ²⁵ Aaron ma natuna Eleasar ma taravaia ma ma ġaiei au ola Hor. ²⁶ Kampa Aaron ana pirisi garana ma votawanei ma natuna Eleasar ma vioteni. Aaron kampa ina iraġe ma noinoina ina votaġoi.”

²⁷ Moses BADA i ririwei i kauei. Taui ola i ġaeni, mai Israel anatapui au matai. ²⁸ Moses Aaron ana pirisi garai i votawanei ma natuna Eleasar i vioteni. Ma kampa ola au tepana Aaron i 'raġe. Ma Moses ma Eleasar i ġaira memei.

²⁹ Maranaġi patarana i aramanei da Aaron i 'raġe ma i touei da au pom 30.

21

Mota bronzei i kauei

⁴ Taui ola Hor i netawanei ma boga lebalebarina etanaina i vaia da Edom ita vorei. Au etanai rava amloi i ġaiġai aubaina ai vaġai i manawa, ⁵ ma Moses ma God i eni i pa, “Aiwai aubaina Egyptei o taravaina-opunelai da au mutulua ana iraġe? Ai lam eġa! Ai waira eġa! Ma wei lam tagogina manna a amgeduaiei.”

⁶ Ma BADA mota ġaiġaiawai i paritawanei awari ma maġamaġau i ani ma i 'raġe. ⁷ Rava i nei Moses awarina

ma i riwa, “Tauai gō’apoapoena a kauei maranai BADA ma tam a parivireviremi. Ma raupari da BADA mota ina vaitawanei.” Ma Moses i raupari rava aubaii.

⁸ Ma BADA Moses i riwei i pa, “Mota gāigāiawana kokoitauna ma kauei ma ai au damona ma raḡini. Maranai mota, rava aiai i ani ma i taepai da mota kokoitauna i ’nanai, ma tauna ina lawana.” ⁹ ☆ Ma Moses mota bronzei i kauei ma ai au damona i raḡini. Maranai mota aiai i ani ma ravana i taepai da mota i ’nanai ma i lawana!

Au Ola Hor da i nae au Moab

¹⁰ Mai Israel i nae ma au Oboth i rauḡaravu. ¹¹ Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei. ¹² Kampa da i nae Zered au wapuna i rauḡaravu. ¹³ Ma wei dobuna i netawanei ma i nae waira Arnon au baba ḡelauna au mutulua mai Amori ai au parata. (Moab ma Amori ai dobu au poui wei wairana e viviparata).

Mai Israel, gulau Sihon i vovaiubai

²¹ Ma mai Israel taupariverena i paritawanei da Sihon mai Amori ai gulau i parivere i pa, ²² “Tauai a gōei da am au dobu ata verautua. Tauai eḡa ana deḡa ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei.”

²³ Wate gulau Sihon mai Israel eḡa ita vianinei da ana au dobu ita verautua. Ma ana sorodia anatapui i tami ma i nae au mutulua da Israel ita nebelei. Au Jahas i ḡeta da Israel maiteni i viḡaiḡaiawa. ²⁴ Wate mai Israel i virewapana ma gulau Sihon i viubai ma ai dobu waira Arnon i ḡae da waira Jabok ana parata i vaia, wei kampa

☆ 21:9: 2Ki 18:4

mai Ammon au dobu e viviparata. Mai Ammon ai parata i gagaloana-kauei ma lamna aubaina mai Israel eġa ai au dobuna ita rui. ²⁵ Ma mai Israel i viġavia da, mai Amori ai melagai i vaipai da i maeni, taon Heshbon ma melagai ġelau kampa maiteni i vaia.

Mai Israel gulau Og i vovaiubai

³¹ Nanare mai Israel mai Amori ai dobu i vaia ma kampa i mae ³² Ma Moses tauivu i paritawanei da Jaser taon i tuvirevirei, ma muriai mai Israel i nae ma ai melagai anapui i vaia ma mai Amori kampa maemaei i viaġaġana-opunei. ³³ Ma mai Israel i vira ma etanaiei i ġae au Bashanei. Ma Bashan ai gulau Og ai sorodia anapui maiteni i opui da tau i nebelei au Edrei. ³⁴ Ma BADA Moses i riwei i pa, “Eġa tauna ma rovoei, aubaina tauna, ana rava anapui, ma ai dobu maiteni au uram a tereterei. Aiwai u kauei Amori ai gulau Sihon awarina, au Heshbon taon, nanare gulau Og awarina ma kauei.” ³⁵ Ma gulau Og i viraġeni natunatuna nelarai ma rava anapui i viraġena-pai, eġa aiai ita mae. Ma mai Israel dobuna i vaia da ai dobu.

22

Balaam Israel ġaġalana i geduaiei

¹ Ma mai Israel i vomairi da Moab au wapuna, Waira Jordan au adana i rauġaravu, ma au baba ġelauna Jeriko taon. ² Ma mai Israel aiwai i kauei mai Amori awari, Zippor natuna Balak anapuna i ’nana-pai. ³ Mai Israel i maġa kua ma lamna aubaina mai Moab i rovo kaukua, rovo ita iraġelei. ⁴ Ma mai Moab mai Midian babadai

i riwei i pa, “Aburuna ava ma wei patarana aiwai anata-puna au ririvata ina pupuna-pai, me bulumakau au wapu modu e amam.”

⁵ Anina ma Moab ai gulau Balak, Beor natuna Balaam ana riwa i paritawanei au Pethor, waira gāeḡaena wavana Euphrates au ririvana. Ana riwa wenanare, “Dam tagogi Egyptei i opu, ma dobu anatapuna e vaivaia ma marina au ririvau i rauḡaravu. ⁶ Tau i virewapana kua eḡa me tau, ma nei ma ravai ma parivai-iviapoapoeni, mepa da tau ravai ana vovaiubai ma wei dobunei ana viaḡaḡana-opunei. Aramanei da maranai tam rava e viviaiaini tauna viaiaina e vaivaia ma maranai u parivai-apoapoeni tauna ina apoapoe.” ⁷ Ma Midian ma Moab babadai mane i vaia Balaam vimaiana aubaina ma i vomairi. Ma i ḡeta Balaam awarina ma Balak ana riwa i pariveri. ⁸ Balaam ravai i paribelei i pa, “Weka ona matave ma au maratam BADA aiwai ina riweu ana pariveremi.” Ma babadai kampa Balaam maiteni i mae. ⁹ God i nei ma Balaam i vitara-virevirei i pa, “Aiavo i nei awarim?”

¹⁰ Balaam i paribelei, “Zippor natuna Balak, Moab ai gulau wei riwana i paritawaneiai i pa, ¹¹ ‘Ma rautaniḡana dam gāeḡaena Egyptei i opui ma dobu anatapuna e vivoiai. Ma nei ma aubaiu ravai ma ḡaḡalei, da maiteni ana viḡaiḡaiawa ma ana viagagei da ina vinelana.”

¹² Wate God Balaam i riwei i pa, “Eḡa maiteni ma nae. Eḡa wei ravai ma ḡaḡalei aubaina Tau au viaiaina awarii.”

¹³ Ubaubanai Balaam i nae ma Balak ana taupariverena i riwei, “Ona nae me ami au melaḡai! BADA eḡa ita vianineu da maitemi tana nae.”

¹⁴ Ma Moab babadai i nae me ai bada Balak awarina ma i riwei i pa, “Balaam eḡa ita goei da ita nei.”

Anina ma Balak babada gāeḡaei i paritawanei Balaam awarina. Ma i riwei da pulo gāeḡaena ita verei mepa da

tauna ita nei da mai Israel ita gāgālei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kauei.

²¹ Ma ubaubanai Balaam i vomairi ana donki i vokaukauei ma Moab babadai maiteni i nae. ²² Wate God amlona i gāiḡai kua da Balaam i nenaē, ma ana anela i paritawanei da ana etanai i mae-tomeni. Balaam donki i gerui ma ana taunola ruaḡa maiteni i nenaē. ²³ Ma maranai donki BADA ana anela i 'nanai ana sodna au etanai i maimairi ma i tawana-ruiei au ririva. Balaam donki i kwakwapui da ita opu me au etanai.

²⁴ Ma BADA ana anela etanai ḡuriḡuririna i mae-potai, Grape ḡoroḡorovai epaepana ruaḡa ḡaime i garigaria au poui. ²⁵ Maranai donki BADA ana anela i 'nanai ma ita deḡa lamna Balaam aena au gari i viairaturatui. Ma Balaam donki i kwapu-melei. ²⁶ Ma BADA ana anela i nae ma etanai au ḡuriḡuririna i mairi, weka eḡa gabu ita mamae-dadana da tau i ita deḡa. ²⁷ Maranai donki anela i 'nanai, i mae-ḡaira da i kiala, Balaam amlona i gāiḡai kua ma ana jiḡonei donki i kwapui.

²⁸ Anina ma BADA donki gamona i votawanei da i babani i pa, “Aiwai apoapoenā a kauei awarim da mara tonuḡa u kwapui?”

²⁹ Balaam donki i riwei i pa, “Tam u vikalokaloeu me bua! Awariu sod lamna marina ata viraḡenim.”

³⁰ Ma donki Balaam i riwei i pa, “Tau donkina tagogina marana patapatai u gerugerui bo? Wenanare a kauana dadanei awarim bo eḡa?”

Balaam i riwa, “Eḡa!”

³¹ Ma BADA Balaam matana i vikalai da ana anela i 'nanai ana sodna i maimairi au etanai. Ma i mae-ḡaira au doa ma i raudune.

³² Ma BADA ana anela i riwa i pa, “Aiwai aubaina am donki mara tonuḡa u ravi? Ma nonori am vaḡai lamna eḡa aiaina, Tau a nei da ata viḡaem.

³³ —Mara tonuḡa am donki i ’nanaiu ma mara tonuḡai i deḡeu. Mepa da eḡa, lamna tau ata viraḡenim ma donki ata voterei.”

³⁴ Ma Balaam BADA ana anela i riwei i pa, “A kauana-boai. Eḡa ata aramanei da tam au etanai u maimairi da uta viḡaeiu. Marina mepa da u notai da eḡa ita ai au matam, tau ana nae me.”

³⁵ BADA ana anela i riwa i pa, “Ravai maiteni ma nae, wate aiwai ana riwem lamna ava ma latoni.” Anina ma Balaam, Balak ana babadai maiteni i nae.

23

Mara tonuḡa Balak pulo i apui Balaam ana god awarina da mai Israel ita ḡaḡalei. Wate marana patapatai Balaam eḡa mai Israel ita ḡaḡalei. Ma God aiaina ita kauei mai Israel awarii lamna ava i bababaniei. Balaam mara 4 God ana babani mai Israel awarii i babaniei. Wei lamna ana babani viruaina.

¹⁸ Ma Balaam wei riwana i riwei i pa,
“Balak, Zippor natuna ma vomairi;
ma Ma rautaniḡana kaua.

¹⁹ God eḡa rava ota, Tauna eḡa ita morumoru.
Bo ana nota ita viravirai.

Tauna aiwai i babaniei,
nanare ina tupua
Aiwai i parivainuaḡani;
nanare ina kauei.

²⁰ I riweu da wei ravai ana viaiaini;
maranai God e viaiaina, tau eḡa tagotagogina da
ana virai.

²¹ BADA ai God

taui maiteni e mamae, ma taui e vovoepaepai da
Tauna ai gulau.

Tauna eġa nuabola bo apoapoe ita neineiai Jacob
ġoġoġana - mai Israel awari.

²² God taui Egyptei i tere-opunei,
Aubaii i viġavia me bulumakau moduei.

²³ Eġa aiai Israel ina ġaġalei,
bo ina baravui.

Marina rava ina riwa,
'Ona inantai God aiwai i kauei mai Israel aubai.'

²⁴ Mai Israel lamna me Lion vivirewapanana.
E vovomairi da ana ġavia e viviraġeni
ma tarana e umaumai,
Anina ma ina rauvirai da ina matave."

24

*Anina ma Balaam mara vi-four-na God riwana i babaniei,
i pa:*

¹⁷ "God i viatataieu da rava muriai e nenei,
a inantai wate eġa laġilaġina ita nenei,

Jacob ana damei gulau ana jiġona

Ana borumana me ubona gamrina Israeliei
e opuopu.

Moab muruai ma Seth natunatuna
anatapui kolai ina viaigwadagwadai.

¹⁸ Ana ġavia Edom ina vovaiubai
ma ai dobu ina vaia,
ma mai Israel ina virewapana guratana.

¹⁹ Gulau, Jacob ana damei ina nei
ma mai Moab mae-tereterei ai au melagai
ina pupuni."

25

Mai Israel, Baal i raudunelei

¹ Maranai mai Israel au Shittim i mamae, nelara i vikarei da Moab waivinei i viawawanei. ² Wei waivine, nelara i riwei da i nei da ai god awarii puloi i apuapui.* Ma anatapui i am gogona ma ai godna i raudunelei. ³ Wei kauanei mai Israel Baal-Peor i voepaepai ma lamnei BADA ana meji i vikalai.

⁴ BADA Moses i riwei i pa, “Babadai anatapui ona vaia ma madeḡai BADA au matana ona viraḡena-naiei, da tau au meji awarimi ina dauva.”

⁵ Ma Moses Israel babadai i riwei i pa, “Taumi tagotagogi ava ami au dam anatapui da Baal-Peor i raudunelei ona viraḡeni.”

⁶ Moses ma Israel patarana BADA ana numa gara au metaeta i toutou, ma au matai oroto Israeliei wavine Midianei i taravaina-ruiei ana au numa gara. ⁷ Maranai Aaron ḡoḡana pirisi wavana Phineas wei kauana i ’nanaanai, boru i voterei ma pawasi i lavui, ⁸ ma Israel iei i votaḡoi da ana au numa gara ma pawasiei uporana i tonai da wavine au uporana i opu-vivira. Ma dorianana apoapoena au Israel i kwa. ⁹ Wate wei gimna rava 24,000 i viraḡeni.

¹⁰ BADA Moses i riwei i pa, ¹¹ “Aaron ḡoḡana pirisi Phineas au meji mai Israel awari i viubai; da tau i eḡa ata pupuni aubaina tauna ana nota me tau au nota, rava eḡa god ḡelau i ina voepaepaei anina Tau ava. ¹² Lamna

* 25:2: Wei kauai lamna god ḡelauna i raudunelei, ma lamnei Moab waivinei ai vitumaḡana nanare i eraerawa. Maranai Israel nelarai wei waivinei maiteni i viviawawana, tau ai god Baal i raudunelei ma i vovoagui da ai dobu ita viaiaini da ita maura.

aubaina tauna ma riwei da maiteni parivainuaḡana bag-
ibagina ana kauei da ata ruaḡa tana viturana vivira. ¹³ Tau
aubaiu ina vipirisi nonoa.”

27

God Joshua i vinei

¹⁸ ☆ Muriai BADA Moses i riwei i pa, “Aruau Nun
natuna - Joshua awarina, lamna aubaina ma taravaini ma
uram au tepana ma terei da ma vovivirei au nola aubaina.
¹⁹ Ma naei Pirisi Eleasar awarina, Israel patarana anata-
pui au matai ma ma viaiaini da ina raviepaiem. ²⁰ Ma vovai-
virewapani da Israel patarana tauna ina rautaniḡanei.
²¹ Tauna Pirisi Eleasar maiteni ina nola da ḡaima
e ḡoreḡorei urim, * awarinei au nota ina vaivaia. Wei
taunei Eleasar, ma Joshua ina agui Israel ai au lawana.”

²² Ma BADA aiwai i ririwei, Moses nanare i kauei.
Joshua i taravaini ma Pirisi Eleasar ma Israel patarana au
naoi i vimairini. ²³ Ma urana au tepana i terei ma i vinei
da ana raviepaia.

33

God mai Israel i egari da Canaan ina vaia

⁵⁰ Mai Israel Moab au wapuna, waira Jordan au ririvana
i mamae ma, mai Jeriko au baba ḡelauna. Ma BADA Moses
i riwei, ⁵¹ “Wei riwai mai Israel ma riwei, ‘Maranai Jordan
o damani da au Canaan, ⁵² Dobuna taumaenina anata-
pui

☆ 27:18: Exo 24:13 * 27:21: Urim lamna ḡaima aburuna. Ma nai
ḡaemana pirisi e viviatataiei da God ana nota i ririweta.
Tauta ega tata aramanei 29-30 Exodus ma inanai.

ona viaḡaḡana-opunei. Ai gana da ai kokoitau anata-
pui ona rika-viamoamoai. ⁵³ Dobu a veremi ona vaia,
ḡariemi da ona maeni. ⁵⁴ Doa ona ḡutai dam damai awarii,
au ḡaima ina viatataiemi nanare. Doa vounaina dam
vounaina ona verei ma dam voaburuna nanare ana ḡuta
voaburuna. Wate ḡaimei ana pariveremi metauna damna,
metauna doana ina vaia. Dam anatapui doa ina vaia.

⁵⁵ —‘Wate mepa da nai dobuna taumaenina eḡa
ona viaḡaḡana-opunei ma o vianinei da ina mae, tau
lamna me vunavuna au matami bo donadona au riri-
vami maemaena, ma wei vita ḡaeḡaena ina veremi
wei au doana. ⁵⁶ Mepa da ravai eḡa ona viaḡaḡana-
opunei. Lamna taumi ana pupunimi me a viogei da tau
ana pupuni.’”

35

Anigagalo melagaii

⁹ Ma BADA Moses i riwei i pa, ¹⁰ “Mai Israel ma riwei,
‘Maranai Waira Jordan o damani da au Canaan o rui,
¹¹ melagai ḡelau i vinei da rava ai aniḡaḡalo. Maranai
rava turana i vunu-boai da i ’raḡe, tau weka ina ruba da
ina gagaloei.’ ¹² Ona riwei, ‘Weka ma mae da raubiwa
ravai eḡa ina vodadanim ma rauetara ma paini.’”

Wedau Mark

The Gospel of Mark in the Wedau Language of Papua New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

Updates

eBible.org

PDF generated using Haiola and XeLaTeX on 18 Nov 2018 from source files dated 12 Nov 2018

aa19f3e3-98fb-51fa-9c53-3906edc75f11